

Li Chabil Esilal



Li Hu Re Xbonbal Chok' Reheb Li Coc'al



Nak ac yo chic xcuak po xcanajic chi yaj aj ixk lix Elisabet, li ángel Gabriel quitaklac xban li Dios sa' jun li tenamit Nazaret xc'aba' li cuan xcuent Galilea. Quitaklac riq'uin jun li xka'al xMaría xc'aba' toj maji' cuanjenak riq'uin cuink. Ac tz'amanbil xban jun li cuink aj José xc'aba'. Li cuink a'an xcomoneb li ralal xc'ajol li rey David. Li ángel quicüulac riq'uin lix María ut quixye re: --Sahak taxak sa' la ch'ol xban nak laät li sic'bil acüu. Li Kacua' cuan acuiq'uin ut osobtesinbilat sa' xyankeb li ixk, chan li ángel.

Ut lix María quisach xch'ol chirabinquil li quixye li ángel. --¿C'a'ru xyälal li atin li xye cue? chan sa' xch'ol. Ut li ángel quixye re: --Matxucuac, María. Li Dios xsic'oc acüu xban nak chabil ana'leb. Anakuan tatcanak chi yaj aj ixk. Li Dios tixq'ue jun ac'ula'al telom ut Jesús lix c'aba' taq'ue. Nimak xcuanquil nak tacuank ut chixjunileb te'na'ok re nak a'an tz'akal Ralal li Dios. Ut li Kacua' taq'uehok xcuanquil chi taklanc jo' nak quicuan chi taklanc li rey David lix xe'tonil yucua'. A'anak chic li cuank xcuanquil chi taklanc sa' xbeneb li ralal xc'ajol laj Jacob. Ut lix cuanquilal tacuank chi junelic. Inc'a' taosok', chan li ángel.

Ut lix María quixye: --Lain aj c'anjel chiru li Kacua' Dios. Xbanuhak cuiq'uin li c'a'ru xaye, chan. Ut chirix chic a'an, co li ángel.

San Lucas 1:26 – 33 ut 38



Laj José qui-el sa' li tenamit Nazaret li cuan sa' xcuent Galilea ut cō Belén li cuan xcuent Judea. A'an xtenamit li rey David. Aran cō xban nak a'an xcomoneb li ralal xc'ajol laj David. Aran quixq'ue xc'aba' chi tz'ibac rochben lix María li ac tz'amanbil xban. Lix María ac yaj aj ixk. Nak ac cuanqueb aran Belén quicūulac xk'ehil nak tayo'lak lix c'ula'al. Ut quiyo'la li xben xc'ula'al, quixlan sa' t'icr ut quixyocob sa' xna'aj xcuaheb li cuacax xban nak mac'a' xna'ajeb sa' eb li ochoch.

San Lucas 2:4-7



Nach' riq'uin li tenamit Belén cuanqueb aj ilol xul yoqueb chixc'ac'alenquil lix quetomk chi k'ek. Mac'a' sa' xch'oleb nak xakamil jun x-ángel li Kacua' chiruheb. Ut quisakeno' chi xjun sutam li cuanqueb cui'. Ut eb laj ilol xul c'ajo' nak que'xucuac. Abanan li ángel quixye reheb: --Mexxucuac xban nak lain xinchal xyebal ere jun chabil esilal. A'in jun sahil ch'olej chok' reheb chixjunileb li tenamit. Anakcuan xyo'la jun laj Colol ere sa' lix tenamit laj David ut a'an li Cristo li Kacua' li yechi'inbil xban li Dios. Jo'ca'in nak tetau. Li c'ula'al lanbil sa' t'icr ut yocyo sa' xben li q'uim sa' xna'aj xcuahab li cuacax. A'in li retalil nak a'an li tetau, chan li ángel. Ut sa' junpat que'chal nabaleb chic li ángel sa' choxa. Yoqueb chixlok'oninquil li Kacua' ut yoqueb chixyebal: --Chinimák taxak xlok'al li Kacua' Dios li cuan sa' choxa ut chicuank taxak li tuktuquilal sa' xyankeb li cristian li raroqueb xban li Dios.--

San Lucas 2:8-14



Ut li c'ula'al yo chi q'uic ut yo chi cacüuc xch'ol. Ut yo chixtaubal xna'leb. Ut li rusilal li Kacua' cuan riq'uin.

San Lucas 2:40



Jo'can nak cō laj Juan laj Cubsihom Ha' sa' li chaki ch'och' ut yō chi cubsinc ha' ut yō chixch'olo-banquil lix yalal chiruheb ut quixye: --Canabomak li macobc. Chi yot'ek' ech'ol ut chejal ec'a'ux ut chec'ul li cubi ha' ut li Dios tixcuy tixsach le mac, chan. Nabaleb laj Judea ut nabaleb ajcui' laj Jerusalén que'cüulac cuan cui' laj Juan chirabinquil li c'a'ru yō chixyebal. Que'xxoto xmac chiru li Dios ut laj Juan quixcubsi xha'eb sa' li nima' Jordán. Li rak' narocsi laj Juan, a'an yibanbil riq'uin rix li xul camello ut lix c'amal xsa', a'an tz'um. Ut aj sac' nextzaca riq'uin xya'al sak c'au. Naxjultica li ratin li Dios reheb li tenamit ut naxye: --Chalc re jun chic li k'axal nim xcuanquil chicüu lain. Xban nak k'axal nim xcuanquil, moco inc'ulub ta nak tinc'utzub cuib re xhitbal xc'amal lix xab. Lain xincubsi eha' riq'uin ha'. Aban a'an tixq'ue ere li Santil Musik'ej, chan.

Sa' eb li cutan a'an li Jesús qui-el chak Nazaret xcuent Galilea. Quicüulac riq'uin laj Juan ut laj Juan quixcubsi xha' aran sa' li nima' Jordán. Ut nak qui-el chak li Jesús sa' li ha', quiril nak quiteli li choxa, ut li Santil Musik'ej quicube chak sa' xben li Jesús. Chanchan jun li paloma nak yō chak chi cubec.

Ut qui-abic xyab xcux li Dios toj sa' choxa. Quixye chi jo'ca'in: --Laat li cualal k'axal rarocat inban. Nasaho' inch'ol acuiq'uin, chan li Dios.

San Marcos 1:4-11



Tojo'nak li Jesús quitake' chiru tzul. Quixbokeb li ani quiraj ut eb a'an coeb chirix. Ut li Jesús quixsiq'ueb ru li cablaju chi cujnk re nak te'cuank riq'uin ut re nak tixtaklaheb chixjulticanquil li ratin li Dios. Ut quixq'ueheb xcuanquil chixq'uirtesinquileb li yaj ut chirisiinquil li mas aj musik'ej.

San Marcos 3:13-15



Quicuan jun li cujnk aj fariseo aj Nicodemo xc'aba'. A'an xcomoneb li neque'taklan sa' xyankeb laj judío. Sa' jun li k'ojyjn laj Nicodemo quicuulac chi atinac riq'uin li Jesús ut quixye re: --At tzolone!, lao nakanau nak riq'uin li Dios chalenakat chak chok' aj tzolol ke xban nak ma ani taruk tixbanu li milagros li nacabanu laa' cui ta macua' riq'uin xcuanquil li Dios, chan.

Quichak'oc li Jesús ut quixye re: --Relic chi yal ninye acue, ma ani naru taoc rubel xnimajcual cuanquilal li Dios cui inc'a' tayo'lak cui'chic xca' sut, chan li Jesús.

Laj Nicodemo quixye re: --¿Chan ta cui' ru nak tayo'lak cui'chic xca' sut junak cujnk? ¿Ma taruk ta bi' taoc cui'chic riq'uin lix na' ut tayo'lak cui'chic xca' sut? chan.

Quichak'oc li Jesús ut quixye re: --Relic chi yal ninye acue nak ani inc'a' tayo'lak riq'uin ha' ut riq'uin li Santil Musik'ej moco taruk ta taoc rubel lix nimajcual cuanquilal li Dios. Li ani yo'lajenak riq'uin lix na' xyucua' cuan xyu'am sa' ruchich'och'. Abanan li ani yo'lajenak riq'uin li Santil Musik'ej cuan xyu'am chi junelic.

San Juan 3:1-6



Chirix a'in li Jesús qui-el Capernaum
 ut co sa' jun chic li tenamit Naín xc'aba'
 rochbened lix tzolom. Ut cuanqueb ajcui'
 nabaleb li tenamit yoqueb chi xic chirix.
 Nak yo chi cūulac cuan cui' li oqueba! re li tenamit
 quiril nak nabaleb li cristian yoqueb chi xic chixmukbal
 jun li camenak. Li camenak a'an xyum jun li xmalca'an.
 Jun ajcui' chiru nak quicuan. Nak li Kaçua' Jesús quiril li xna' li camenak, quiril xtok'oba! ru ut quixye
 re: --Matyabac, chan. Li Jesús quinach'oc riq'uineb ut quixch'e' li tusbil che' li yoqueb chixpakonquil cui'
 li camenak. Ut eb li yoqueb chi c'amoc re li camenak que'xakli ut li Jesús quixye re li camenak: --At saj
 cuink, lain tinye açue, cuaclin, chan. Ut li camenak quicuacli ut quichunla ut qui-oc chi atinac riq'uineb.
 Ut li Jesús quixk'axtesi re lix na'. Nak que'ril li c'a'ru quic'ulman chixjunileb li cuanqueb aran, c'ajo' nak
 que'xucuac ut que'oc chixq'uebal xlok'al li Dios. Ut que'xye: --Jun xnimal ru profeta xc'ulun sa' kayank.--
 Ut que'xye ajcui': --Li Dios xchal chixtenk'anquil lix tenamit, chanqueb.

San Lucas 7:11-16



Li Jesús quiril nak nabaleb li yoqueb chi cuulac riq'uin. Quixye re laj Felipe: --¿Bar t̄aruk takalok' xcuahēb chixjunileb li tenamit a'in? chan.

Quixye chi jo'can yal re rilbal c'a' na ru tixye laj Felipe xban nak ac cuan sa' xch'o! li Jesús nak tixq'ue xcuahēb. Quixye laj Felipe: --Kacua', cuib ciento denario chi caxlan cua inc'a' t̄atz'aklok re te'tz'ak ca'ch'inak chi xjunkaleb,

chan. Jun chic reheb lix tzolom aj Andrés xc'aba' ras laj Simón Pedro. Quixye: --Cuan jun li al arin cuan cuib li car riq'uin ut ob li caxlan cua yibanbil riq'uin cebada. Abanan a'in ma' jok'e t̄atz'aklok reheb li q'uila tenamit, chan. Ut quixye li Jesús reheb: --Q'uehomakeb chi c'ojlac li tenamit.-- Nabal li pach'aya' cuan aran. Chixjunileb que'c'ojla sa' li pach'aya'. ob mil na chi cuink li cuanqueb aran. Tojo'nak li Jesús quixchap li caxlan cua. Quixbantioxi chiru li Dios. Quixjachi li caxlan cua ut quixq'ue reheb lix tzolom re nak te'xjeq'ui reheb li q'uila tenamit li c'ojc'o'queb aran. Jo'can ajcui' quixbanu riq'uin li car. Ut que'cua'ac chixjunileb toj retal que'c'ojla xch'o'leb. Nak ac xe'rake' chi cua'ac, li Jesús quixye reheb lix tzolom: --Xocomak li jo' q'uial x-ela'an re nak ma'c'a' t̄atz'ekmank, chan. Que'xxoc cablaju chacach rela' li caxlan cua yibanbil riq'uin cebada. A'an li qui-ela'an nak que'rake' chi cua'ac chixjunileb li cuanqueb aran. Nak que'ril li milagro li quixbanu li Jesús, eb li cuanqueb aran que'xye: --Relic chi ya! li cuink a'in, a'an li profeta li quiyehē' chak resil junxil nak t̄achalk sa' ruchich'och', chanqueb.

San Juan 6:5-14



Oc re k'ojyïn nak cœb lix tzolom li Jesús chire li palau. Li Jesús maji' nacuulac riq'uineb. Que'oc sa' jun li jucub ut yoqueb chi xic sa' li tenamit Capernaum li cuan jun pac'al li palau. Ac x-oc li k'ojyïn nak quichal jun cacuil ik' ut qui-oc chi ec'anc ru li palau chi cau. Cuan na xcab legua ac xe'bec chiru li ha' sa' li jucub nak que'ril nak yo chak chi chalç li Jesús. Yo chi bec chiru li ha'. Yo chak chi nach'oc chixc'atk li jucub. C'ajo' nak que'xucuac xban nak inc'a' que'xnau ru. Ut li Jesús quixye reheb: --Lain. Mexxucuac, chan. Ut c'ajo' xsahil xch'qleb nak que'rocsi sa' li jucub. Ut sa' ajcui' li hõnal a'an que'cuulac sa' li na'ajej li yoqueb cui' chi xic.

San Juan 6:16-21



Sa' jun li cutan cuan li coc'al que'c'ame' chak riq'uin li Jesús re nak tixq'ue li ruk' sa' xbeneb ut tarosobtesiheb. Ut lix tzolom que'xk'us li que'c'amoc chak reheb li coc'al. Nak li Jesús quixq'ue retal li yoqueb chixbanunquil, c'ajo' nak quipo' ut quixye reheb lix tzolom: --Canabomakeb li coc'al chi chalc cuiq'uin. Meram chiruheb xban nak lix nimajcual cuanquilal li Dios, a'an reheb li neque'paban jo' nak neque'paban li coc'al. Relic chi yal tinye ere li ani inc'a' napaban jo' li coc'al, a'an inc'a' tarechani lix nimajcual cuanquilal li Dios, chan. Ut li Jesús quixk'aluheb li coc'al, quixq'ue li ruk' sa' xbeneb, ut quirosobtesiheb.

San Marcos 10:13-16




Lain chanchanin jun li chabil pastor. Junak chabil pastor naxk'axtesi lix yu'am sa' xc'aba'eb lix carner.

San Juan 10:11

Eb li cualal inc'ajol neque'rabi li c'a'ru ninye. Lain ninnauheb ru ut eb a'an neque'xbanu li c'a'ru ninye. Lain tinq'ueheb xyu'am chi junelic. Inc'a' te'osok' ut ma ani taruk tamak'ok reheb chicuu.

San Juan 10:27-28



Ut eb laj fariseo rochbened li xbenil aj tij que'xch'utub ribeb riq'uineb li neque'taklan sa' xyankeb laj judío ut que'xye reheb: --¿C'a'ru takabanu? Li cujnk a'in nabal li milagro yo chixbanunquil. Cui takacanab chi jo'can, chixjunileb li tenamit te'pabank re. Ut te'josk'ok kiq'uin eb laj Roma li neque'taklan sa' kaben. Te'xjuc' li katemplo ut te'xsach li katenamit, chanqueb.

Jun li cujnk aj Caifás xc'aba', a'an li xyucua'il aj tij sa' li chihab a'an. Quixye reheb: --Laex mac'a' ena'leb. ¿Ma inc'a' nequec'oxla nak k'axal us raj nak tacamk jun chi cujnk sa' xc'aba'eb li tenamit chiru nak tasachek' ku chikajunilo lao aj judío xbaneb laj Roma? chan. Laj Caifás, a'an li xyucua'il aj tij sa' li chihab a'an.

Ut li c'a'ru quixye inc'a' quixye yal xjunes. Quixye ban xban nak li Dios quic'utuc chiru li c'a'ru tixye. Jo'can nak quixye nak li Jesús tacamk sa' xc'aba'eb laj judío. Ut macua' ca'aj cui' sa' xc'aba'eb a'an nak tacamk li Jesús. Re aj ban cui' nak junajakeb chic ru chixjunileb li ralal xc'ajol li cuanqueb sa' chixjunil li ruchich'och'. Ut chalen sa' li cutan a'an, eb li neque'taklan sa' xyankeb laj judío que'oc xc'ubanquil ru sa' comonil chanru nak te'xcamsi li Jesús.


San Juan 11:47-53



Ut nak qui-ecüu sa' li cutan a'an, quic'ojla li Jesús sa' mex rochbeneb lix cablaju chi tzolom. Ut nak yoq**ue**b chi cua'ac, li Jesús quixye reheb: --Relic chi yal tnye ere nak jun ere laex tak'axtesink cue sa' ruk'eb li xic' neque'iloc cue, chan. Ut mac'a' jo' nak que'raho' sa' xch'oleb. Ut chi xjunjunkaleb que'xpatz' re: --¿Ma lain ta bi' tink'axtesink acue, Kacua'?--

Quichak'oc li Jesús ut quixye reheb: --Li tak'axtesink cue, a'an li tixtz'a xcaxlan cua sa' li sec' li tintz'a cui' li cue lain.

San Mateo 26:20-23




Que'xc'am ajcui' rochben li Jesús cuibeb li cujnk li cuanqueb xmac re te'camsik rochben li Jesús. Ut que'cüulac sa' li na'ajej Gólgota xc'aba'. Chi jalbil ru naraj naxye: Xna'aj Xbakel Xjolom Camenak. Ut aran que'xq'ue chiru cruz li Jesús. Ut que'xq'ue ajcui' chiru cruz li cuib chi cujnk li cuanqueb xmac. Jun li cruz que'xq'ue sa' xnim uk' li Jesús ut li jun chic que'xq'ue sa' xtz'e.

San Lucas 23:32-33

Jun reheb laj mac li que'q'uehe' chiru cruz rochben, quixhob ajcui' li Jesús ut quixye: --Cui la^{at} li Cristo, col acuib la^{at}, ut choacol ajcui' la^o, chan re. Abanan li jun chic quichak'oc ut quixk'us ut quixye re: --Chi moco la^{at} nacaxucua ru li Dios, usta juntak'et li raylal li yoco chixc'ulbal kochben a'an. Relic chi yal nak la^o kac'ulub xc'ulbal li raylal a'in xban nak la^o cuan kamac. Abanan li cujnk a'in mac'a' junak mac xbanu, chan re. Ut li cujnk a'an quixye ajcui' re li Jesús: --At Kacua', chinjulticok' taxak acue nak tat-oc sa' la^a nimajcual cuanquilal, chan. Ut li Jesús quixye re: --Relic chi yal tinye acue nak hon ajcui' cuankat cuiq'uin sa' li paraíso, chan re.




San Lucas 23:39-43



Tuktu cua'leb quik'ojyino' sa' chixjunil li ruchich'och' ut toj sa' oxib or re ecüu quicutano' cui'chic. Nak quik'ojyino' ru li sak'e, lix t'icrul li templo quik'iche' sa' xyi. Quiatinac li Jesús chi cau xyab xcux ut quixye: --At inYucua', sa' acüuk' tink'axtesi lin musik', chan. Nak quixye a'an, qui-el xch'ol.

Li capitán aj Roma quixq'ue retal li quic'ulman. Quixlok'oni li Dios ut quixye: --Relic chi yal nak li cuink a'in t̄ic xch'ol, chan.

San Lucas 23:44-47



Ac yo chi oc k'o_jyin nak quicüulac aran bar que'xcamsi cui' li Jesús jun li cu_ink biom, aj José xc'aba'. Arimatea xtenamit. A'an xtzolom ajcui' li Jesús nak quicuan. Li cu_ink a'in co_o riq'uin laj Pilato ut quixtz'ama chiru nak taq'uehek' re lix tz'ejcual li Jesús re nak tixmuk. Ut laj Pilato quixtakla xk'axtesinquil re. Ut laj José quixc'am li camenak ut quixlan sa' jun li ac' t'icr lino. Ut quixq'ue sa' jun li ac' mukleba_l. Re raj a'an li mukleba_l nak quiyiba_c sa' jun sakona_c. Ut quixbalk'usi jun nimla pec chire li mukleba_l ut co_o.

Ut cuanqueb aran lix María aj Magdala ut lix María jun chic. C'o_jc'o_oqueb aran chi xca'yaba_l li mukleba_l.

San Mateo 27:57-61





Sa' li xben li cutan re li xaman, toj ek'ela chi us, coeb li ixk cuan cui' li mukleba_l. Que'xc'am li sununquil ban li que'xyib. Ut cuanqueb jalaneb chic ixk rochbeneb. Nak que'cüulac, que'ril nak ac isinbil chic li nimla pec li natz'apoc re li mukleba_l. Ut nak que'oc chi sa' li mukleba_l, inc'a' que'xtau li camenak.

Que'sach xch'oleb ut inc'a' que'xnau c'a'ru te'xbanu. Ut xakamil chiruheb cuib li cujnk. Nalemtz'un li rak'eb. C'ajo' nak que'xucuac li ixk. Que'xxulub li riloba_l. Ut eb li cujnk que'xye reheb: --¿C'a'ut nak nequesic' li yo'yo sa' xyankeb li camenak? A'an ma' ani chic arin. Ac xcuaclicui'chic chi yo'yo. Chijulticok' ere li c'a'ru quixye chak nak toj cuank chak Galilea. Quixye nak tento tak'axtesik li C'ajolbej sa' ruk'eb li cujnk aj mac. Taq'uehek' chiru cruz ut tacamsik. Ut quixye ajcui' nak tacuaclik cui'chic chi yo'yo sa' xyankeb li camenak sa' rox li cutan, chanqueb.

Riq'uin a'an quinak sa' xch'oleb li ixk li c'a'ru quixye li Jesús.

San Lucas 24:1-8




Sa' ajcui' li hōnal a'an que'suk'i Jerusalén. Aran que'xtau li junlaju chi apóstol ch'utch'uqueb rochbened lix comon. Yoqueb chixyebal: --Relic chi yal nak xcuacli cui'chic chi yo'yo li Kacua' xban nak xc'utbesi rib chiru laj Simón, chan queb. Tojo'nak li cuib chi cujnk que'xserak'i reheb li c'a'ru quic'ulman sa' be nak yoqueb chi xic Emaús. Que'xye reheb chanru nak que'xnau ru li Jesús nak quixjachi li caxlan cua.

Toj yoqueb ajcui' xserak'inquil li c'a'ru que'xc'ul nak ac xakamil li Jesús sa' xyankeb ut quixye reheb: --¡Chicuank taxak li tuktuquil usilal eriq'uin! chan reheb. Ut eb a'an sachsoqueb xch'ol que'cana ut te'xucuak. Sa' xch'oleb a'an

nak mare junak musik'ej yoqueb chirilbal. Ut li Jesús quixye reheb: --¿C'a'ut nak nequexxucuac? Ut, ¿c'a'ut nak na-oc ec'a'ux? Lain li Jesús. Ilo mak li cuok ut li cüuk'. Ch'e'omakin re nak teq'ue retal nak lain tz'akal. Junak musik'ej, a'an mac'a' xbakel, chi moco cuan xtibel. Ilo mak. Lain cuan inbakel ut cuan intibel, chan reheb.

Ut nak yo chixyebal a'in, quixc'ut li rok ut li ruk' chiruheb.

San Lucas 24:33-40



Quixye reheb: --Jo'ca'in tz'jbanbil chak retalil sa' li Santil Hu chicuix la'in: tento nak li Cristo tixc'ul li raylal ut sa' rox li cutan tacuaclik cui'chic chi yo'yo sa' xyankeb li camenak. Tz'jbanbil ajcui' retalil nak tajulticamank chiruheb chixjunileb li tenamit nak tento te'xyot' xch'oleb ut te'xjal xc'a'uxeb re tacuymank tasachmank lix maqueb sa' xc'aba' a'an. Taticlak xch'olobanquil arin Jerusalén. Laex texyehok resil xban nak laex xex-abin re ut laex xex-iloc re chixjunil li c'a'ak re ru a'in.

San Lucas 24:46-48

Ut li Jesús quixc'ameb toj sa' li tenamit Betania. Quixtaksi li ruk' ut quirosobtesiheb. Nak yo chirosobtesinquileb, quirisi rib sa' xyankeb ut quic'ame' takec' sa' choxa.

San Lucas 24:50-51

Li Dios c'ajo' nak quixraheb li cuanqueb sa' ruchich'och' nak quixq'ue li Ralal junaj chi ribil re nak chixjunileb li ani te'pabank re inc'a' te'sachk. Tacuank ban xyu'ameb chi junelic. Li Dios inc'a' quixtakla chak li Ralal sa' ruchich'och' chixtenebanquil li tojba mac sa' xbeneb li cuanqueb sa' ruchich'och'. Quixtakla ban chak re nak sa' xc'aba' a'an te'colek'. Li ani napaban re, mac'a' li tojba mac sa' xben. Abanan li ani inc'a' napaban re, ac cuan li tojba mac sa' xben xban nak inc'a' xpab li Ralal li Dios, li junaj chi ribil.

San Juan 3:16-18

Cui nakaye nak mac'a' kamac, nakabalak'i kib ut moco yal ta li yoco chixyebal. Cui nakaxoto li kamac chiru li Dios, relic chi yal nak a'an tic xch'ol chixcuybal chixsachbal li kamac, ut tarisi chixjunil li kamausilal.

Li Xben Juan 1:8-9

Li Jesús quixye re: --Lain aj c'amol be cheru. Lain ninch'olob li xyalal li Dios ut lain ninq'uehoc junelic yu'am. Ma ani taruk taoc riq'uin lin Yucua' cui inc'a' tinixpab lain.

San Juan 14:6

Jo'can ut chalkex cuiq'uin chejunilex li lubluquex ut li tacuajenakex ut lain texinq'ue chi hilanc. C'ulumak li yugo li tinq'ue sa' eben ut tzolomak erib cuiq'uin xban nak tulanin ut k'un inch'ol ut tetau xc'ojobanquil ech'ol, xban nak lin yugo k'un ut seb li ik li tinq'ue sa' eben.

San Mateo 11:28-30

Nabal chic li milagro quixbanu li Jesús chiruheb lix tzolom li inc'a' tz'ibanbil retalil sa' li hu a'in. Abanan li jo' q'ual tz'ibanbil retalil sa' li hu a'in, quitz'ibac re nak tepab nak li Jesús, a'an li Cristo. A'an li Ralal li Dios. Quitz'ibac re nak riq'uin xpabanquil tacuank eyu'am chi junelic sa' xc'aba' a'an.

San Juan 20:30-31

Lain ac cuanquin chak sa' xticlajic ut tincuank chi junelic k'e cutan. Lain ac cuanquin chak sa' xticlajic li ruchich'och' ut cuankin ajcui' sa' roso'jic.--

Apocalipsis 22:13

Sa' li griego naxye: Lain li Alfa ut li Omega. Alfa naraj naxye "ac cuan ajcui' chak sa' xticlajic" ut li Omega naraj naxye nak "cuank ajcui' sa' roso'jic."



Cui lat nacacuaj xpabanquil li JesuCristo, taye li tij a'in ut li Kacua' tatxcol.

At Kacua' Dios, li cuancat sa' li Santil Choxa. Ninnau chi tzakal nak lain aj mac. Nacuaj bantioxinquil acue nak xatakla chalk la cualal junaj chi ribil chi camc chiru curz xban lin mac. Bantiox acue nak tacuy ajcui' lin mac ut xban a'an tinc'ul li junelic yu'am. Tincuaj apabanquil ut tincuank jo' aj pabanel. Banu usilal tajal lin yu'am ut taberesi lin yu'am rajlal cutan.

Jo'can taxak.

Tatz'jba la c'aba'

Tatz'jba li cutan

Cui laat xattijoc chi jo'c'a'in, tasic' jun li Santil Hu ut tacuil rajlal cutan. Tatxic sa' jun li iglesia rajlal xaman ut taye re la na' ut la yucua' ut la pastor nak xapab li Jesucristo.

Ilustrado por: Linda Riddell

Publicado Por:
Little Palm Press
P.O. Box 541215
Merritt Island, Florida
32954-1215



K'ekchi'